



**PRIMEIRO  
MINISTRO**

**DISKURSU SUA ESELÊNSIA PRIMEIRU-MINISTRU  
REPÚBLIKA DEMOKRÁTIKA TIMOR-LESTE,  
DR. RUI MARIA DE ARAÚJO,  
IHA OKASIAUN TOMADA POSE PREZIDENTE  
NO KOMISÁRIUS NAIN HAAT KOMISAUN FUNSAUN PÚBLIKA**

**Salão Nobre do MNEC  
Loron 29 fulan Maiu tinan 2015**

Excelência Presidente do Parlamento Nacional  
Excelência Presidente do Tribunal de Recurso  
Exmos. Senhores membros do Parlamento Nacional e membros do Governo  
Exmo. Senhor Provedor dos Direitos Humanos e Justiça  
Exmo. Senhor Presidente e Comissários da Comissão da Função Pública empossados  
Exmo. Senhor Presidente e Comissários da Comissão da Função Pública cessantes  
Exmo. Senhor Presidente da Comissão Anti-Corrupção  
Exmo. Senhor Inspector-Geral do Estado  
Exmo. Senhores Directores-Gerais e Nacionais  
Exma. Senhora Primeira-Dama

Exmo. Senhores Representantes do Corpo Diplomático  
Exmo. Senhor Representante das Nações Unidas

Senhoras e Senhores,

Ho laran ksolok mak ohin hau fó posse ba Prezidente no Komisáriu Komisaun Funksaun Públika foun, entidade ne'ebé maka responsábel liu hodi garante funsaun públika ida ne'ebé profisional hodi bele garante liu tan prestasaun servisu ne'ebé ho kualidade ba Estadu no ba sidadaun sira.

Uluk nanain hau hakarak agradese, ho Governo no Povo Timor nia naran, ba Prezidente Eng.º Libório Pereira no Komisáriu hotu-hotu:

- Dra. Isabel Ferreira
- Dra. Jesuína Ferreira Gomes
- Dr. Abel dos Santos Fátima
- Dr. Alexandre Gentil Corte-Real de Araújo,

ne'ebé hakotu ona sira nia funsaun, ba imi nia servisu ezemplar ne'ebé imi hatudu iha tinan lima nia laran wainhira hahu hamosu komisaun ida ne'e. Hau hatene katak iha tinan hirak ne'e nia laran sai hanesan dezafiu ida, liu liu koalia kona ba entidade ida ne'e nia servisu ne'ebé fó impaktu boot ba país, maibé, imi simu ho responsabilidade hodi hari'i no konsolida instituisaun ne'e. Ba imi nia empenhu hotu hotu, responsabilidade no profisionalismu, ne'ebé imi hatudu durante ezersísu iha imi nia mandatu hodi servisu ba Estadu, hau hato'o hau nia sentidu rekoñesimentu no gratidaun.

Hau hakarak mós saúda emposadus foun sira :

- Dr. Faustino Cardoso Gomes, Komisáriu no Prezidente Komisaun Funksaun Públika
- Dra. Maria Domingas Alves, Komisária Komisaun Funksaun Públika
- Dra. Jacinta Bernardo, Comissária Komisaun Funksaun Públika
- Dra. Maria Olandina Caeiro Alves, Komisária Komisaun Funksaun Públika
- Dr. José Telo Soares Cristóvão, Komisáriu Komisaun Funksaun Públika,

ne'ebé heta fiar husi Parlamentu Nasional no Governu, atu tinan liman oin mai sei asume diretiva Komisaun ida ne'e nian, kargu ne'ebé ho responsabilidade a'as, hodi asume mós kompromissu atu servi no defende país no timor oan sira. Hau depozita ba Señor Prezidente no Senhoras no Señores Komisáriu hau nia konfiansa no serteza katak imi sei dezenpeña imi nia funsaun, empenhu no dedikasaun, ho forma imparcial, íntegra no livre husi kualker interese polítiku.

Komisaun Funksaun Públika, hari'i iha tinan 2009, estabelese ho hanoin ida atu reforsa kapasidade ita nia Administrasaun, no hodi garante setor ida ne'ebé iha mérito, no tuir modelu profisional ida ne'ebé a'as tebes, atu nune'e iha funsaun públika ida ne'ebé fó ba ita nia povu servisu ida ho kualidade, ho forma efisiente, hodi bele garante jestaun efektivu no ekonómiko ba iha dezempeñu, ho kondisoens ne'ebé indispensável ba dezvoltamentu nasional.

Iha tinan hirak liu ba, Komisaun Funksaun Públika haka'as an servisu iha sentidu ida ne'e, hodi estabelese base ne'ebé sólidu iha funsaun públika, inklui kuadru regulatório no lejislativu hodi bele jere no avalia rekursus umanus nasionais.

Iha 2011, estabelese tiha ona Grupu Profisionais Rekursus Umanus, kompostu husi teknikus profisionais iha liñas ministeriais área ida ne'e nian, hetan mós apoiu husi Sekretaria Estadu Fortalesimentu Institusional. Grupu ida ne'e hasoru malu fulan fulan hodi partilla sira nia esperiênsia no informasoens, halo cordenasaun ho Komisaun Funksaun Públika, no sai hanesan ponte hodi halo divulgasaun ba polítikas jestaun no dezvoltamentu rekursus umanus.

Ikus liu mai ne'e, iha Jullu 2014, Komisaun Funksaun Públika halo lansamentu ba Manual Rekursus Umanus ba dahuluk, dokumentu ida ne'e fundamental tebes hodi bele orienta prosesu avaliasaun ba funsionáriu públikus, ne'ebé iha mós diretrizes kona ba rekrutamentu no jestaun dezempeñu nian, nune'e mós ba prosedimentus disiplinares, inklui direitus no deveres funsionáriu ida idak nian.

Komisaun Funksaun Públika, agora dadaun, gere hela PMIS - Sistema Informasaun no Jestaun Pessoal (SIJP), baze ba dados ida ne'e importante tebe-tebes, tanba inklui mós dados pessoais no profisionais funsionarius públikus hotu hotu nian.

Wainhira entidade ida ne'e hahú nia funsaun, Administrasaun Públika iha funsionáriu hamutuk ema 26.000, maibé agora dadaun besik 32.000, ho hamenus maka'as ba dadauk ona número funsionáriu temporáriu. Ne'e prezisa avalia no hatene katak número ida ne'e bele justifika, bainhira ita haré ba prestasaun servisu públikus ne'ebé ho kualidade ba populasaun, no iha duni sentidu ida ne'ebé lolós atu servisu iha ekipa, responsabilidade ho empeñu, sai hanesan rekisitus obrigatóriu hodi dezenpeña kargus públikus.

Escelênsias  
Señoras no Señores

VI Governu rekoñese katak, iha progresu barak mak visíveis no diak iha nível governasaun no sektor públiku. Governu empenhadu tebes atu konsolida progresu sira ne'e, aprende ho lisaun sira ne'ebé liu tiha ona no kontinua halo reforma hodi dezvoltolve funsaun públika ida ne'ebé forte hodi bele responde ba kualker no desafio hotu hotu.

Ami hatene katak, atu mellora prestasaun servisu ba populasaun, fundamentu ida mak tenke halo reforma ba iha administrasaun públika. Nune'e, "halo reforma" signifika katak "halao ba oin" (progredir), hodi bele sai prósperu liu tan. Iha funsaun públika ida

ne'ebé maka eficiente liu, servisu ho rigor liu, qualidade no responsabilidade, hamenus liu tan burokrazia no simplifika liu tan, ne'e sai hanesan kompromissu boot ne'ebé Governu tomak assume.

Reforma ne'ebé maka ita hakarak realiza, sai hanesan prinsípiu sira ne'ebé maka tenke tau atensaun didi'ak no sai esensial tebes ba servisu sira ne'ebé funsionáriu públiku sira dezenpeña, no tenke aplika loron loron, iha kualker okasiaun.

Nune'e, atu buat sira ne'e bele akontese, iha nesesidade atu halo regulamentu ho deskrisaun funsoens hotu hotu, iha planu anual atividades no metas ne'ebé atu alkansa, nune'e mós ho deveres no responsabilidade funsionáriu públikus sira nian. Ita mós labele haluha katak ita iha nesesidade atu aumenta sira nia kualifikasaun, liu husi formasaun no kapasidade, hodi halo avaliasaun ida ne'ebé adekuaudu no jestaun ba dezempeñu, ho baze iha mérito, ne'ebé krusial hodi bele determina progresu no responsabilizasaun ida idak nian.

Ho sentidu ida ne'e maka ami konjela tiha rekrutamentu ba funsionarius permanentes foun, no ami komesa haré dadauk ona kuadru jurídiku, Lei Funsauun Públika, Estatutus Funsauun Públika, parseria ho Komisaun Funsauun Públika no dirijentes Rekursus Umanus nian.

Hau fiar katak, iha liñas ministeriais, ita bele no tenke asumi responsabilidade ne'ebé boot kona ba sira nia jestaun atividade loron loron, ne'e inklui rekrutamentu, avaliasaun dezenpeñu no prosedimentu disciplinares. Komisaun Funsauun Públika, sei asumi nia papel hodi halo monitorizasaun no supervizaun atividade rotina sira ne'e, hodi mós fó apoiu tekniku, to'o bainhira instituisaun ida idak iha ona kapasidade implementasaun, nune'e nia sei sai hanesan instituisaun konselleiro ida ba Governu iha setor públiku.

Hodi bele konkretiza, Komisaun Funsauun Públika konsentra nia servisu ba iha polítikas boboot, servisu ho dadus tuir números funsionários sira nian, tabelas remuneratórias no funsoens no kompetênsias.

Hau apela mós ba Komisaun Funsauun Públika, Sekretaria Estadu Fortalesimentu Institucional no Provedoria Direitu Umanu no Justisa, atu hala'o servisu di'ak liu tan, wainhira servisu atu desenvolve polítikas hodi melloria prestasaun servisu ba sidadaun sira, supervizona formasaun no valorizasaun ba funsionáriu públikus, imi fortalese no pomove dadaun ona boa governasaun.

Eselênsia  
Señoras no Señores

Atu ita bele kumpre lolós ita nia objetivu ne'ebe halo diversifikasaun ekonómika no desenvolvimentu sustentável, ita presiza iha sektor públiku ida ne'ebé halo servisu públikus ho efisiênsia no qualidade, no mós responsável ba sira nia servisu no jestaun ba bens públikus. Atu bele konsege lalais liu tan, kompetensia no transparênsia iha tratamentu ba prosesus ne'ebé nesesariu tebes ba desenvolvimentu negósius, ita kontribui dadaun ona ba desenvolvimentu sektor privadu ne'ebé sai hanesan ai-suak ida iha sektor ekonómiku.

Molok hakotu, hau la haluha, agradese ba Austrália ne'ebé fó nia apoiu tékniku, nune'e mós fó agradesimentu ba Portugal no Brazil, ne'ebé ami sura nafatin ho imi nia apoiu iha nível formasaun.

Ikus liu, ba Komisarius sira ne'ebé ohin simu tomada de posse, susesu boot ba imi hotu bainhira ezerse imi nia funsaun, fiar metin katak ho imi nia ezemplu ne'ebé di'ak sei lori dezvoltamentu sustentavel ba ita nia Nasaun.

Muito obrigado e bom trabalho!

Dr. Rui Maria de Araújo  
Díli, 29 de Maio de 2015